

समे – 12:25

<><><><><><>

Campaigning

लोकसभा चुनावों में गेड़ लेई मुक्की गेआ। इस गेड़ च 6एं राज्यें ते 2 केन्द्र शासित प्रदेशों दे 58 लोकसभा सीटें च शनिवार 25 मई गी वोट पाए जांगन। इंदे च बिहार दियां 8, हरियाणा दियां सारियां 10, जम्मू कश्मीर दी इक, ओडिशा दियां 6, झारखंड दियां 4, उत्तर प्रदेश दियां 14 ते पच्छिम बंगाल दियां 8 सीटां शामिल न। इनें 58 लोकसभा सीटें पर कुल 889 मेदवार मैदान च न। मतदान बडलै 7 बजे थमां लेइयै संजा 6 बजे तगर होग। बीजेपी दे वरिष्ठ नेता ते प्रधानमंत्री नरेन्द्र मोदी होरें कल हरियाणा दे महेन्द्रगढ़ च ते पंजाब दे पटियाला च रैलियां कीतियां। कांग्रेस नेता राहुल गांधी होरें बी कल हरियाणा दे महेन्द्रगढ़ च रैली कीती। दिल्ली च बीजेपी दे मनोज तिवारी ते बांसुरी स्वराज, आम आदमी पार्टी दे सोमनाथ भारती ते कुलदीप कुमार ते कांग्रेस दे कन्येआ कुमार ते जे.पी.अग्रवाल मैदान च न। 1 करोड़ 50 लक्ख कोला मते मतदाता इंदे भविक्ख दा फैसला करगंन।

<><><><><><>

Anantnag-Rajouri

कल लोकसभा चुनावों में गेड़ तैहत अनंतनाग-राजौरी संसदीय सीट च बी वोट पोआए जांगन। 18 लक्ख 36 जहार मतदाता चुनावों मैदान च खडोते दे 20 मेदवारें दे भविक्ख दा फैसला करगंन। सीईओ आस्सेआ थोइ दी जानकारी मूजब कुलगाम, अनंतनाग, पुंछ, शोपियां ते राजौरी च 18 लक्ख 36 जहार 576 वोट न, जिंदे च 9 लक्ख 33 जहार 647 मर्द ते 9 लक्ख 2 जहार 902 महिला ते 27 ट्रांसजेंडर मतदाता शामिल न। चुनावों आयोग नै अनंतनाग-राजौरी संसदीय सीट लेई 2 जहार 338 मतदान केन्द्र बनाए दे न। हर इक मतदान केन्द्र च प्रिसाइडिंग अफसरें सनें लोडचदे चुनावी अमले गी सरबंधत मतदान केन्द्र च तैनात कीता जाग। 9 जहार शा मते चुनावी अमलें गी चुनावी ड्यूटी लेई तैआर कीता गेदा ऐ। राजौरी ते पुंछ दे बन्ने कन्नै लगदे इलाकें च 19 मतदान केन्द्र स्थापत कीते गेदे न। मतदान बडलै 7 बजे शा लेइयै संजा 6 बजे तगर चलोग ते जेकर कुसा बी मतदान केन्द्र च वोटरें दियां लम्भियां-लम्भियां रींगा लगी दियां होंगन तां उत्थें मतदान दा समां बधाई दित्ता जाग।

हर इक मतदान केन्द्र च पानी, बिजली, शौचालय, बौहने दी थाहर, शामयाना ते बुर्जुगें ते दिव्यागजनें लेई व्हील चेर दी सुविधा गी जकीनी बनाया जाग ।

<><><><><><>

Migrant Voters

25 जहार शा मते विस्थापत कश्मीरी पंडित 25 मई गी 6में गेड़ तैहत अनंतनाग-राजौरी संसदीय सीट लेई वोट पाए जांगन। इस गेड़ तैहत देश दिएं 58 लोकसभा सीट लेई वोट पोआए जांगन। आकाशवाणी दे जम्मू संवाददाता होरें जानकारी दित्ती ऐ जे प्रशासन नै एहदे लेई व्यापक प्रबंध कीते दे न। जम्मू च 29, उधमपुर च इक ते दिल्ली एनसीआर च 4 मतदान केन्द्र स्थापत कीते गेदे न। जम्मू च 29 मतदान केन्द्रें चा 8 सहायक मतदान केन्द्र न जिंदे चा 2 चिनोर दे गौरमेंट मिडल स्कूल च 2 मुट्ठी दे गौरमेंट हायर सकेंडरी स्कूल च, 2 जगटी टाउनशिप च ते 1-1 मतदान केन्द्र कृषि परिसर उदयवाला, बोहड़ी ते बरनाई दे अनुराधा हायर सकेंडरी स्कूल च स्थापत कीता गेआ ऐ। एहदे इलावा मतदान केन्द्रें च सीसीटीवी दी सुविधा, पीने आले पानी, शामयाने ते ट्रांसपोर्ट दी सुविधा दित्ती जा'रदी ऐ। पैहली बारी वोट पाने आलें गी तोहफे बी दित्ते जा'रदे न।

<><><><><><>

Rajouri Security

कल अनंतनाग-राजौरी संसदीय हल्के च लोकसभा चुनां दे 6में गेड़ तैहत वोट पोआए जांगन, जेहदे मददेनजर उत्थें सुरक्षा दे निगगर बंदोबस्त कीते गेदे न। आकाशवाणी दे जम्मू संवाददाता होरें जानकारी दित्ती ऐ जे केन्द्रीय सशस्त्र पुलस बल, सीआरपीएफ, जम्मू कश्मीर पुलस ते आईआरपी दे 150 शा मती कंपनिएं दी तैनाती बक्ख-बक्ख मतदान केन्द्रें ते होर दुए इलाकें च कीती गई दी ऐ। सुरक्षा अजेंसिएं राजौरी ते पुंछ जिले च चुनां प्रक्रिया गी निरपक्ख आजादाना ते घटनामुक्त बनाने लेई पक्के प्रबंध कीते दे न। बहुआयामी रणनीति ते चुनां सुरक्षा योजना तैआर कीती गई ऐ। सब्बने मतदान केन्द्रें गी दो श्रेणिएं च बंडेआ गेदा ऐ। पैहली श्रेणी च ओह मतदान केन्द्र च जेहड़े सामान्य इलाके च औंदे न ते दूई श्रेणी सुरक्षा दे साब्बै असामान्य इलाके शामिल न। जिंदे च दूर दरेड़े दे इलाके ते ओ इलाके शामिल न जित्थें पिछले किश ब'रें थमां आतंकी वारदाता होइयां न। एहदे इलावा मतदान थाहरें उप्पर सुरक्षा बवस्था सख्त कीती गई दी ऐ। संवेदनशील इलाके च तुरत कारवाई

करने आलिंगं टीमां तैनात कीती गई दियां न। सब्बने ईवीएम डिसपैच केन्द्रें ईवीएम जमा करने आले केन्द्रें ते चुनावी अमले गी लेइयै जाने आलिंगं गडिडएंगं ते होर दुए जरूरी थाहर उप्पर सुरक्षा दे अंतजाम कीते गेदे न।

<><><><><><><><>

Poonch

चुनां प्रक्रिया च सरकारी कर्मचारिएंगं गी मती शा मती शमूलियत गी जकीनी बनाने लेई जिला मैजिस्ट्रेट पुंछ होरें 25 मई गी सब्बने सरकारी कर्मचारिएंगं लेई छुट्टी दी घोषणा कीती ऐ। हालांके उनें एह साफ कीता ऐ जे चुनावी अमले लेई कोई छुट्टी नेई होग। तोआई जिला मैजीस्ट्रेट होरें 23 थमां 25 मई तगर अनंतनाग—राजौरी संसदीय हल्के च आम चुनाएं गी दिक्खदे होई ड्राई डे घोषत कीता ऐ। आदेशें मूजब कोई बी नशीला पद्दार्थ जां शराब 48 घेंटे दरान कुसा बी मतदान आले इलाके होटल, दुकान जां होर कुसा थाहर बंडेआ ते बेचेआ नेई जाग। जिला मैजिस्ट्रेट होरें सुरनकोट, पुंछ हवेली ते मेंढर च मतदान केन्द्रें गी नो समोकिंग जोन करार दित्ता ऐ।

<><><><><><><><>

Youth Training

केन्द्रीय सूचना ते प्रसारण सचिव संजय जाजू होरें कल गलाया ऐ जे राष्ट्रीय उत्कृष्टता केन्द्र नोजवानें गी एनीमेशन ते विजुअल अफैक्टें उप्पर सिखलाई देग। चेन्नई च पत्रकारें कन्नै गल्ल करदे होई उनें गलाया जे फिल्म निर्माण च 3 लक्ख करोड़ रपे दे उद्योग गी आधुनिक तकनीकें दे बक्ख—बक्ख पैहलुएं च कौशल दी लोड़ ऐ। उनें गलाया जे उत्कृष्टता केन्द्र उद्योग जगत दी जरूरतें गी पूरा करोग। सचिव होरें सूचना ते प्रसारण दे मीडिया प्रमुखें दे कन्नै बी चर्चा कीती ते उनेंगी मंत्रालय दे उद्देश्यें गी अग्गे बधाने लेई इक रूपरेखा तैआर करने लेई गलाया। सचिव होर कल चेन्नई च इक दिने दे दौरे उप्पर हे।

<><><><><><><><>

Heat Wave

मौसम विभाग नै जम्मू कश्मीर च अगले किश दिनें गर्मी दे प्रकोप दे जारी रौहने दी शैंका जताई ऐ। मौसम विभाग दे इक अधिकारी नै गलाया ऐ जे आम तौरा उप्पर मौसम दे खुश्क रौहने दी मेद ऐ, पर कुसै7कुसै थाहर उप्पर गरज चमक कन्नै बरखा बरने दी मेद ऐ। 29 मई शा 31 मई तगर मौसम आंशक तौरा उप्पर बदलौरखडा रौहग ते कुसै-कुसै थाहर हल्की बरखा पौने दी बी मेद ऐ। मौसम विभाग नै लोके गी गर्मी थमां बचने लेई घरे अंदर रौहने ते मते थमां मता पानी पीने दी सलाह जारी कीती ऐ।

<><><><><><>